

Na osnovu Sporazuma između Evropske zajednice i Bosne i Hercegovine o readmisiji osoba koje borave bez dozvole ("Službeni glasnik BiH - Međunarodni ugovori", br. 13/07) i drugih bilateralnih sporazuma o readmisiji, Strategije za prihvata i integraciju bh. državljana koji se vraćaju po osnovu sporazuma o readmisiji i Akcionog plana za period 2015-2018. godina, član 12. Zakona o ministarstvima i drugim organima uprave Bosne i Hercegovine („Službeni glasnik BiH“, br. 5/03, 42/03, 26/04, 42/04, 45/06, 88/07, 35/09, 59/09, 103/09, 87/12 i 6/13), član 30. Zakona o republičkoj upravi („Službeni glasnik RS“, br. 118/08, 11/09, 74/10, 86/10, 24/12, 121/12, 15/16 i 57/16), član 11. Uputstva o načinu privremenog zbrinjavanja državljana Bosne i Hercegovine po osnovu Sporazuma o readmisiji („Službeni glasnik BiH“, broj: 39/13), važećih zakonskih propisa Brčko distrikta Bosne i Hercegovine, Federacije Bosne i Hercegovine i Republike Srpske, kao i važećih kantonalnih, gradskih i općinskih propisa iz oblasti zdravstvene i socijalne zaštite, a uzimajući u obzir potrebu osiguranja nesmetanog prihvata, proprata i privremenog zbrinjavanja osoba koje se vraćaju po osnovu sporazuma o readmisiji, Ministarstvo za ljudska prava i izbjeglice Bosne i Hercegovine, Odjeljenje za raseljene osobe, izbjeglice i stambena pitanja Vlade Brčko distrikta Bosne i Hercegovine, Federalno ministarstvo raseljenih osoba i izbjeglica, uz prethodnu saglasnost kantonalnih vlada i Ministarstvo za izbjeglice i raseljena lica Republike Srpske, donose

PROTOKOL

o postupanju nadležnih organa u prihvatu, propratu i privremenom zbrinjavanju ranjivih readmisiranih osoba koje se vraćaju po osnovu sporazuma o readmisiji

Član 1.

(Predmet Protokola)

- (1) Ovim protokolom se uređuju međusobna prava i obaveze Ministarstva za ljudska prava i izbjeglice Bosne i Hercegovine, Federalnog ministarstva raseljenih osoba i izbjeglica, Ministarstva za izbjeglice i raseljena lica Republike Srpske i Odjela za raseljene osobe, izbjeglice i stambena pitanja Vlade Brčko distrikta Bosne i Hercegovine, kod postupanja nadležnih organa u prihvatu, propratu i privremenom zbrinjavanju ranjivih osoba koje se vraćaju po osnovu sporazuma o readmisiji (u daljnjem tekstu: ranjive readmisirane osobe).
- (2) Također, ovim protokolom se uređuje koordinacija i saradnja između potpisnika protokola, kao i između drugih nadležnih organa u postupku prihvata, proprata i privremenog zbrinjavanja readmisiranih osoba, radi podrške ranjivim readmisiranim osobama.
- (3) Potpisnici protokola su saglasni da usko sarađuju sa mjesno nadležnim organima u pružanju podrške ranjivim readmisiranim osobama.

Član 2.

(Odnos Protokola prema zakonima)

Potpisnici Protokola će u svom postupanju djelovati u skladu sa materijalnim propisima iz okvira svojih nadležnosti, te u skladu sa Strategijom za prihvata i integraciju bh. državljana koji se vraćaju po osnovu sporazuma o readmisiji i Akcionim planom.

Član 3. **(Osnovni principi)**

- (1) Osnovni principi na kojima se zasniva ovaj protokol su:
 - a) princip slobodne volje;
 - b) princip koordinacije i saradnje;
 - c) princip nediskriminacije.
- (2) **Princip slobodne volje** podrazumijeva da su potpisnici protokola slobodni, da u granicama prinudnih propisa, javnog poretka i dobrih običaja, svoje odnose urede po svojoj volji.
- (3) **Princip koordinacije i saradnje** podrazumijeva napore koordiniranog pristupa i saradnje nadležnih institucija i organa na svim nivoima vlasti u postupcima prihvata, proprata i privremenog zbrinjavanja ranjivih readmisiranih osoba.
- (4) **Princip nediskriminacije** podrazumijeva osiguranje jednakosti u postupanju s pojedincima, bez obzira na rasu, boju kože, jezika, vjere, etničke pripadnosti, invaliditeta, starosne dobi, nacionalnog ili socijalnog porijekla, veze s nacionalnom manjinom, političkog ili drugog uvjerenja, imovnog stanja, članstva u sindikatu ili drugom udruženju, obrazovanja, društvenog položaja i spola, seksualne orijentacije, rodnog identiteta, spolnih karakteristika, kao i svaka druga okolnost koja ima za svrhu ili posljedicu da bilo kojem licu onemogućiti ili ugrožava priznavanje, uživanje ili ostvarivanje na ravnopravnoj osnovi, prava i sloboda u svim oblastima života.

Član 4. **(Nadležni organi)**

Nadležni organi za provođenje ovog Protokola su: Ministarstvo za ljudska prava i izbjeglice Bosne i Hercegovine (u daljnjem tekstu: MLJPI), Federalno ministarstvo raseljenih osoba i izbjeglica (u daljnjem tekstu: FMROI), Ministarstvo za izbjeglice i raseljena lica Republike Srpske (u daljnjem tekstu: MIRS), Odjel za raseljene osobe, izbjeglice i stambena pitanja Vlade Brčko distrikta Bosne i Hercegovine (u daljnjem tekstu: Odjel BD BiH), Ministarstvo zdravlja i socijalne zaštite Republike Srpske, kantonalna ministarstva/uprave/uredi za pitanja izbjeglica i raseljenih osoba, rada, zdravstva i socijalne politike i gradski/općinski organi za pitanja zdravstvene i socijalne zaštite.

Član 5. **(Definicije)**

- (1) **Ranjiva readmisirana osoba** u smislu ovog protokola je državljanin BiH koji se vraća u BiH po osnovu sporazuma o readmisiji, jer je njegov boravak u zemlji prihvata proglašen nezakonitim, a radi se o sljedećim slučajevima:
 - a) osoba koja je ilegalno ušla na teritoriju države ugovornice ili tamo ilegalno boravi;
 - b) osoba koja po isteku važenja vize ili boravka za koji nije potrebna viza, bespravno boravi na teritoriji države ugovornice;
 - c) osoba koja po isteku dozvole boravka, koju je izdala država ugovornica bespravno boravi na njenoj teritoriji;

- d) osoba kojoj je u postupku pred nadležnim organima države ugovornice odbijen zahtjev za azil i koja je obavezna da napusti teritoriju države ugovornice.
- (2) **Prihvat**, u smislu ovog Protokola, smatra se preuzimanje ranjive readmisirane osobe, od strane nadležnog organa, na bilo kojem graničnom prelazu u Bosni i Hercegovini.
- (3) **Proprat**, u smislu ovog Protokola, smatra se prijevoz, osiguranje i potrebna pratnja, readmisirane osobe od graničnog prelaza do mjesta gdje se osigurava privremeno zbrinjavanje.
- (4) **Ranjivim kategorijama** readmisiranih osoba, u smislu ovog protokola, smatraju se osobe koje su u skladu sa propisima o zdravstvenoj i socijalnoj zaštiti Brčko distrikta Bosne i Hercegovine, Federacije Bosne i Hercegovine, Republike Srpske, kantona, gradova i općina, definirane kao osobe kojima je potrebna posebna zaštita ovisno od stepena ranjivosti.
- (5) **Privremeno zbrinjavanje**, u smislu ovog protokola, jeste osiguranje bilo kojeg prihvatljivog oblika asistencije nadležnih organa za pitanje zdravstva ili socijalne zaštite u postupku primjene propisa kojim se osigurava pravo i mogućnost da ranjiva readmisirana osoba bude institucionalno zbrinuta.
- (6) **Kantonalni koordinator za pitanje readmisije**, u smislu ovog protokola, jeste organ na kantonalnom nivou koji je nadležan za koordinaciju mjera i aktivnosti koje je potrebno poduzeti u cilju osiguranja uvjeta za prihvat, proprat i privremeno zbrinjavanje ranjivih readmisiranih osoba, a svoju koordinirajuću ulogu, u personalnom smislu, ostvaruje putem osobe koja je zvanično imenovana za obavljanje poslova koordinacije.

Član 6. **(Obaveze MLJPI)**

U smislu ovog protokola, obaveze MLJPI su:

- a) preuzimanje od Ministarstva sigurnosti BiH najava za prihvat ranjivih readmisiranih osoba, sa raspoloživom i pratećom dokumentacijom;
- b) osiguranje boravka tima za prihvat u restriktivnoj zoni graničnog prelaza;
- c) osiguranje tranzitnog boravka u Readmisionom centru „Salakovac“ u Mostaru, u slučajevima kada to tip ranjivosti dopušta;
- d) razmjena svih relevantnih informacija sa organima nadležnim za realizaciju ovog protokola;
- e) unapređenje sistema koordinacije i razmjene podataka.

Član 7. **(Obaveze MIRL RS)**

U smislu ovog protokola, obaveze MIRL RS su:

- a) preuzimanje zahtjeva za prihvat, proprat i privremeno zbrinjavanje ranjivih readmisiranih osoba od MLJPI, koji se odnose na teritoriju Republike Srpske;
- b) koordinacija aktivnosti sa drugim institucijama i ustanovama u Republici Srpskoj u vezi sa prihvatom, propratom i privremenim zbrinjavanjem ranjivih readmisiranih osoba na teritoriji Republike Srpske;
- c) analiza zaprimljenih slučajeva prijehata, proprata i privremenog zbrinjavanja ranjivih readmisiranih osoba;
- d) sačinjavanje planova teritorijalnog razmještanja ranjivih readmisiranih osoba ukoliko nije poznato ili nije bilo uspostavljeno posljednje mjesto prebivališta u Republici Srpskoj;

- e) informiranje lokalnih zajednica, odnosno lokalnih readmisionih timova o povratku ranjivih readmisiranih osoba;
- f) prikupljanje i obrada podataka o porodici ranjivih readmisiranih osoba, kao i o statusu imovine ranjivih readmisiranih osoba;
- g) razmjena informacija i drugih saznanja o stanju u lokalnoj zajednici sa MLJPI;
- h) uređenje i unapređenje odnosa sa drugim organima Republike Srpske u vezi sa načinom prihvata, proprata i privremenog zbrinjavanja ranjivih readmisiranih osoba.

Član 8.

(Obaveze FMROI)

U smislu ovog protokola, obaveze FMROI su:

- a) preuzimanje zahtjeva za prihvrat, proprat i privremeno zbrinjavanje ranjivih readmisiranih osoba od MLJPI, koji se odnose na teritoriju Federacije BiH;
- b) koordinacija aktivnosti za prihvrat i integraciju ranjivih readmisiranih osoba na području Federacije BiH;
- c) analiza zaprimljenih slučajeva prihvata, proprata i privremenog zbrinjavanja ranjivih readmisiranih osoba za teritoriju Federacije BiH;
- d) izrada planova teritorijalnog razmještanja ranjivih readmisiranih osoba ukoliko nije poznato ili nije bilo uspostavljeno posljednje mjesto prebivališta u Federaciji BiH;
- e) razmjena informacija i drugih saznanja u vezi sa prihvatom, propratom i privremenim zbrinjavanjem ranjivih readmisiranih osoba, koji se odnose na teritoriju Federacije BiH, sa MLJPI, kao i sa kantonalnim koordinatorima, nadležnim za pitanje readmisije.

Član 9.

(Obaveze Kantonalnog koordinatora za pitanje readmisije)

U smislu ovog protokola, obaveze Kantonalnog koordinatora za pitanje readmisije su:

- a) preuzimanje zahtjeva za prihvrat, proprat i privremeno zbrinjavanje ranjivih readmisiranih osoba od MLJPI i FMROI, koji se odnose na teritoriju nadležnog kantona;
- b) koordinacija aktivnosti sa drugim kantonalnim institucijama i ustanovama u vezi sa prihvatom, propratom i privremenim zbrinjavanjem ranjivih readmisiranih osoba na teritoriji nadležnog kantona;
- c) organizacija sastanaka sa svim nadležnim organima na nivou kantona, u cilju potpunog upoznavanja sa specifičnostima svakog slučaja;
- d) organizacija trijaže slučajeva prema kategoriji ranjivosti, a koja se vrši od strane stručnih osoba, predstavnika nadležnih kantonalnih organa, odnosno organa grada ili općine;
- e) organizacija aktivnosti na izradi plana potreba ranjivih readmisiranih osoba;
- f) predlaganje izmjena i dopuna finansijskih planova i programa, koji se odnose na problematiku ranjivih readmisiranih osoba i readmisije u cjelini, praćenje izdvajanja budžetskih sredstava na nivou kantona i lokalnih zajednica, na ime zadovoljavanja potreba ranjivih readmisiranih osoba i njihove integracije;
- g) ažuriranje podataka o ranjivim readmisiranim osobama;
- h) razmjena informacija i drugih saznanja u vezi sa prihvatom, propratom i privremenim zbrinjavanjem ranjivih readmisiranih osoba sa drugim nadležnim organima na kantonalnom, entitetskom i državnom nivou;
- i) praćenje procesa integracije ranjivih readmisiranih osoba i izvještavanje FMROI i MLJPI.

Član 10.

(Obaveze Odjela BD BiH)

U smislu ovog protokola, obaveze Odjela BD BiH su:

- a) zaprimanje zahtjeva za prihvata, proprat i privremeno zbrinjavanje ranjivih readmisiranih osoba od MLJPI, koji se odnose na teritoriju Brčko distrikta BiH;
- b) koordiniranje aktivnosti sa drugim organima javne uprave Brčko distrikta BiH u vezi sa prihvatom, propratom i privremenim zbrinjavanjem ranjivih readmisiranih osoba na teritoriji Brčko distrikta BiH;
- c) organiziranje sastanaka u cilju potpunog upoznavanja ostalih nadležnih organa javne uprave Brčko distrikta BiH sa specifičnostima svakog slučaja;
- d) organiziranje trijaže slučajeva prema kategoriji ranjivosti;
- e) organiziranje aktivnosti na izradi plana potreba;
- f) predlaganje izmjena i dopuna finansijskih planova i programa, koji se odnose na problematiku ranjivih readmisiranih osoba i readmisije u cjelini;
- g) ažuriranje podataka o ranjivim readmisiranim osobama;
- h) kontinuirana razmjena podataka o readmisiranim osobama sa MLJPI.

Član 11.

(Obaveze potpisnika u odnosu na integraciju ranjivih readmisiranih osoba)

Potpisnici ovog protokola se obavezuju da će informirati ranjive readmisirane osobe o načinu ostvarivanja prava i dostupnosti prava iz oblasti zdravstvene i socijalne zaštite, stvoriti uvjete i osigurati podršku za uključivanje u sistem zdravstvene i socijalne zaštite, uključujući i usluge socijalne zaštite posredstvom nadležnih centara za socijalni rad, te stvarati uvjete i osiguranje podrške za uključivanje ranjivih readmisiranih osoba u sistem tržišta rada.

Član 12.

(Finansiranje)

Sredstva za finansiranje aktivnosti koje proizilaze po osnovu prihvata, proprata i privremenog zbrinjavanja ranjivih readmisiranih osoba osiguravaju se iz:

- a) budžeta Institucija Bosne i Hercegovine, Brčko distrikta BiH, Federacije BiH, Republike Srpske, kantona, gradova i općina;
- b) sredstava osiguranih po osnovu programa i projekata;
- c) donatorskih i drugih sredstava.

Član 13.

(Međusobna komunikacija potpisnika Protokola)

Potpisnici ovog protokola se obavezuju da će u međusobnoj komunikaciji kao i komunikaciji s drugima poštovati pravilo diskrecije, profesionalne i etičke standarde svoje struke i institucije, kao i Zakon o zaštiti ličnih podataka („Službeni glasnik BiH“, br. 49/06 i 76/11), a u svrhu adekvatnog postupanja sa ličnim podacima ranjivih readmisiranih osoba.

Član 14.
(Zaštita ličnih podataka)

Podaci koje prenose potpisnici ovog protokola razmjenjivat će se i obrađivati u skladu sa Zakonom o zaštiti ličnih podataka („Službeni glasnik BiH“, broj 49/06, 76/11), posebno uzimajući u obzir sljedeće kriterije:

- a) potpisnik ovog protokola koji primi podatke može ih upotrijebiti samo u svrhu koja je određena ovim protokolom;
- b) lični podaci smiju se saopćavati samo nadležnim organima i službenicima za neposredni kontakt koji su odgovorni za primjenu ovog protokola i koji ih smiju koristiti isključivo na način utvrđen ovim protokolom. Osoba koja saopćava podatke garantuje da su podaci tačni, potrebni i ne izlaze iz okvira svrhe radi koje su saopćeni;
- c) ukoliko su podaci nezakonito saopćeni, o tome će se odmah obavijestiti potpisnik protokola koji je podatke primio, kako bi se podaci ispravili ili uništili;
- d) saopćeni lični podaci čuvaju se onoliko vremena koliko je potrebno za svrhu radi koje su saopćeni;
- e) svaki potpisnik ovog protokola će, u skladu sa članom 11. Zakona o zaštiti ličnih podataka, osigurati sigurnost podataka i saopćene lične podatke zaštititi od neovlaštenog pristupa, izmjene ili otkrivanja.

Član 15.
(Rješavanje spornih pitanja)

Sporna pitanja u primjeni Protokola rješavat će se sporazumno.

Član 16.
(Izmjene i dopune Protokola)

U slučaju potrebe, strane potpisnice ovog protokola i davaoci saglasnosti na isti, mogu inicirati izmjene i dopune ovog protokola na isti način kako je i donesen.

Član 17.
(Naknadne konsultacije strana potpisnica)

Pitanja koja nisu definirana ovim protokolom, a u vezi su sa procesom readmisije, bit će predmet naknadnih konsultacija između nadležnih organa naznačenih u ovom protokolu.

Član 18.
(Sastavni dio Protokola)

Sastavni dio ovog protokola čini:

- a) tok komunikacije između nadležnih organa u primjeni Protokola za prihvata, proprat i privremeno zbrinjavanje ranjivih readmisiranih osoba koji se vraćaju po osnovu sporazuma o readmisiji (hodogram);
- b) grafički prikaz relacija između nadležnih organa u okviru Protokola za prihvata, proprat i privremeno zbrinjavanje ranjivih readmisiranih osoba koje se vraćaju po osnovu sporazuma o readmisiji;
- c) saglasnost kantonalnih vlada za potpisivanje protokola.

Član 19.
(Jezici i pisma)

Protokol je sačinjen u tri izvornika, na službenim jezicima u Bosni i Hercegovini - bosanskom jeziku, hrvatskom jeziku i srpskom jeziku, pri čemu su svi tekstovi jednako vjerodostojni.

Član 20.
(Stupanje na snagu)

Ovaj protokol stupa na snagu danom potpisivanja.

Ministarstvo za ljudska prava i izbjeglice BiH
Semiha Borovac, ministrica

Br: 01-41-2-134-87/17
27.12.2018

Ministarstvo za izbjeglice i raseljena lica
Republike Srpske
Davor Čordaš, ministar



BROJ: 18.03/1-09-82/18
DATUM: 29-11-2018



Federalno ministarstvo za raseljene osobe i izbjeglice
Edin Ramić, ministar

Br: 01-36-1960-1/18
24-12-2018



Odjel za raseljene osobe, izbjeglice i stambena
 pitanja Vlade Brčko distrikta BiH

Petar Vrhovac, šef Odjela

BROJ: 05-000408/18.
DATUM: 14.12.2018.g.

**Tok komunikacije između nadležnih organa u primjeni Protokola
za prihvata, proprat i privremeno zbrinjavanje ranjivih osoba koje se vraćaju po osnovu
sporazuma o readmisiji**

(Hodogram)

1. Kada Ministarstvo za ljudska prava i izbjeglice Bosne i Hercegovine, zaprimi od Ministarstva sigurnosti Bosne i Hercegovine zahtjev za prihvata, proprat i privremeno zbrinjavanje ranjivih osoba koje se vraćaju po osnovu sporazuma o readmisiji (u daljnjem tekstu: ranjive readmisirane osobe), započinje primjena „Protokola o postupanju nadležnih organa u prihvata, propratu i privremenom zbrinjavanju ranjivih readmisiranih osoba koje se vraćaju po osnovu sporazuma o readmisiji“.
2. Komunikacija između nadležnih organa u primjeni Protokola iz prethodne tačke, prikazana je ovim Hodogramom, kako slijedi:
3. Ministarstvo za ljudska prava i izbjeglice Bosne i Hercegovine, zahtjeve za prihvata, proprat i privremeno zbrinjavanje ranjivih readmisiranih osoba, klasificira prema teritorijalnoj pripadnosti i iste dostavlja koordinirajućim organima za pitanja readmisije na nivou Brčko distrikta Bosne i Hercegovine, Federacije Bosne i Hercegovine i Republike Srpske.
4. Istovremeno, Ministarstvo za ljudska prava i izbjeglice Bosne i Hercegovine zahtjeve za prihvata, proprat i privremeno zbrinjavanje ranjivih readmisiranih osoba za područje Federacije Bosne i Hercegovine dostavlja Kantonalnim koordinatorima za pitanje readmisije, poštujući princip teritorijalne pripadnosti.
5. Ministarstvo za ljudska prava i izbjeglice Bosne i Hercegovine vrši prihvata i registraciju ranjive readmisirane osobe na graničnom prelazu, uvodi tim za podršku iz nadležne lokalne zajednice u restriktivnu zonu graničnog prelaza.
6. U slučaju potrebe, te ukoliko priroda ranjivosti dozvoljava, ranjiva readmisirana osoba se, prije upućivanja u nadležnu lokalnu zajednicu, prevozi i osigurava smještaj na period do 30 dana u Readmisionom centru u Mostaru, gdje joj se pored smještaja, osigurava ishrana, lične higijenske potrepštine i medicinski pregled.
7. Koordinirajući organ za Brčko distrikt Bosne i Hercegovine će zaprimiti zahtjeve za prihvata, proprat i privremeno zbrinjavanje ranjivih readmisiranih osoba od Ministarstva za ljudska prava i izbjeglice Bosne i Hercegovine, koji se odnose na teritorij Brčko distrikta Bosne i Hercegovine.
- 7.1. Nakon zaprimljenih zahtjeva, uspostavlja se mehanizam koordinacije sa drugim nadležnim organima javne uprave u Vladi Brčko distrikta Bosne i Hercegovine, koji poduzimaju sve aktivnosti u vezi sa prihvatom, propratom i privremenim zbrinjavanjem ranjivih readmisiranih osoba na teritoriji Brčko distrikta Bosne i Hercegovine.

- 7.2. Koordinacija se uspostavlja s ciljem potpunog upoznavanja svih nadležnih organa javne uprave sa specifičnostima svakog slučaja.
- 7.3. U okviru koordinacije, koordinirajući organ organizira trijažu slučajeva prema kategoriji ranjivosti i sačinjava plan privremenog zbrinjavanja ranjivih readmisiranih osoba, sa preciznim zadacima svakog od uključenih nadležnih organa.
- 7.4. Koordinirajući organ, nakon preuzetih slučajeva ranjivih readmisiranih osoba, predlaže izmjene i dopune finansijskih planova i programa, koji se odnose na problematiku ranjivih readmisiranih osoba i readmisije u cjelini, na teritoriji Brčko distrikta Bosne i Hercegovine.
- 7.5. Koordinirajući organ vrši tromjesečno, a po potrebi i češće, ažuriranje podataka o ranjivim readmisiranim osobama, te kontinuirano vrši razmjenu podataka o readmisiranim osobama sa Ministarstvom za ljudska prava i izbjeglice Bosne i Hercegovine.
8. Federalno ministarstvo raseljenih osoba i izbjeglica, kao koordinirajući organ za Federaciju Bosne i Hercegovine zaprima sve zahtjeve za prihvrat, proprat i privremeno zbrinjavanje ranjivih readmisiranih osoba od Ministarstva za ljudska prava i izbjeglice Bosne i Hercegovine, koji se odnose na teritorij Federacije Bosne i Hercegovine.
- 8.1. Izvršice analizu zaprimljenih slučajeva ranjivih readmisiranih osoba, za koje se traži prihvrat, proprat i privremeno zbrinjavanje na teritoriji Federacije Bosne i Hercegovine.
- 8.2. Sačinice plan teritorijalnog razmještaja ranjivih readmisiranih osoba, ukoliko nije poznato ili nije bilo uspostavljeno posljednje mjesto prebivališta u Federaciji Bosne i Hercegovine.
- 8.3. Uspostaviće saradnju sa Kantonalnim koordinatorima za pitanje readmisije i aktivno raditi na osiguranju uvjeta za prihvrat, proprat i privremeno zbrinjavanje ranjivih readmisiranih osoba na teritoriji bilo kojeg kantona unutar Federacije Bosne i Hercegovine.
- 8.4. Predlagati izmjene i dopune finansijskih planova i programa, koji se odnose na problematiku ranjivih readmisiranih osoba i readmisije u cjelini, na teritoriji Federacije Bosne i Hercegovine.
- 8.5. Koordinirajući organ za Federaciju Bosne i Hercegovine redovno razmjenjuje informacije i druga saznanja u vezi sa prihvatom, propratom i privremenim zbrinjavanjem ranjivih readmisiranih osoba, koji se odnose na teritorij Federacije Bosne i Hercegovine, kako sa Ministarstvom za ljudska prava i izbjeglice Bosne i Hercegovine, tako i sa kantonalnim koordinatorima za pitanje readmisije.
9. Kantonalni koordinator za pitanje readmisije zaprima zahtjeve za prihvrat, proprat i privremeno zbrinjavanje ranjivih readmisiranih osoba od Ministarstva za ljudska prava i izbjeglice Bosne i Hercegovine i Federalnog ministarstva raseljenih osoba i izbjeglica, koji se odnose na teritorij pripadajućeg kantona.
- 9.1. Kantonalni koordinator za pitanje readmisije, organizuje sastanke sa drugim nadležnim kantonalnim organima u cilju koordinacije aktivnosti, u vezi sa prihvatom, propratom i privremenim zbrinjavanjem ranjivih readmisiranih osoba na teritoriji pripadajućeg kantona.

- 9.2. Upoznaje druge nadležne organe sa specifičnostima svakog najavljenog slučaja.
- 9.3. Organizira trijaže slučajeva prema kategoriji ranjivosti, a koja se vrši od strane stručnih osoba, predstavnika nadležnih kantonalnih organa, odnosno organa grada ili općine.
- 9.4. Nakon obavljene trijaže, u saradnji sa drugim nadležnim organima sačinjava plan privremenog zbrinjavanja ranjivih readmisiranih osoba, sa preciznim zadacima svakog od uključenih nadležnih organa.
- 9.5. Nakon preuzimanja slučajeva ranjivih readmisiranih osoba, predlaže izmjene i dopune finansijskih planova i programa, koji se odnose na problematiku ranjivih readmisiranih osoba i readmisije u cjelini, prati izdvajanja budžetskih sredstava na nivou kantona i lokalnih zajednica, na ime zadovoljavanja potreba ranjivih readmisiranih osoba i njihove integracije.
- 9.6. Kantonalni koordinator za pitanje readmisije redovno razmjenjuje informacije i druga saznanja u vezi sa prihvatom, propratom i privremenim zbrinjavanjem ranjivih readmisiranih osoba, koji se odnose na teritorij Federacije Bosne i Hercegovine, kako sa federalnim koordinatorom, tako i sa nadležnim organima gradova i općina na teritoriji pripadajućeg kantona.
- 9.7. Kantonalni koordinator za pitanje readmisije redovno ažurira podataka o ranjivim readmisiranim osobama i upravlja bazom podataka na kantonalnom nivou, te prati proces integracije ranjivih readmisiranih osoba na teritoriji pripadajućeg kantona.
10. Ministarstvo za izbjeglice i raseljena lica Republike Srpske, kao koordinirajući organ za Republiku Srpsku, zaprima sve zahtjeve za prihvrat, proprat i privremeno zbrinjavanje ranjivih readmisiranih osoba od Ministarstva za ljudska prava i izbjeglice Bosne i Hercegovine, koji se odnose na teritorij Republike Srpske.
- 10.1. Vršiti koordinacije aktivnosti sa drugim institucijama i ustanovama u Republici Srpskoj u vezi sa prihvatom, propratom i privremenim zbrinjavanjem ranjivih readmisiranih osoba na teritoriji Republike Srpske.
- 10.2. Dogovara modalitete međusobne saradnje i unaprjeđenja odnosa sa drugim nadležnim organima u Republici Srpskoj, u vezi sa načinom prihvata, proprata i privremenog zbrinjavanja ranjivih readmisiranih osoba.
- 10.3. Analiza zaprimljene slučajevne prihvata, proprata i privremenog zbrinjavanja ranjivih readmisiranih osoba i sačinjava plano teritorijalnog razmještanja ranjivih readmisiranih osoba, ukoliko nije poznato ili nije bilo uspostavljeno posljednje mjesto prebivališta u Republici Srpskoj.
- 10.4. Ostvaruje saradnju sa lokalnim zajednicama u Republici Srpskoj i iste, preko lokalnih readmisionih timova, informira o povratku ranjivih readmisiranih osoba.
- 10.5. U saradnji sa lokalnim zajednicama prikuplja i obrađuje podatke o porodici ranjivih readmisiranih osoba, kao i o statusu imovine ranjivih readmisiranih osoba.

- 10.6. Redovno razmjenjuje informacije i druga saznanja u vezi sa prihvatom, propratom i privremenim zbrinjavanjem ranjivih readmisiranih osoba, koji se odnose na teritorij Republike Srpske, kako sa Ministarstvom za ljudska prava i izbjeglice Bosne i Hercegovine, tako i sa lokalnim zajednicama u Republici Srpskoj.
11. Potpisnici ovog protokola redovno informišu ranjive readmisirane osobe o dostupnosti prava i način uključivanja u sistem zdravstvene i socijalne zaštite, uključujući i usluge socijalne zaštite posredstvom nadležnih centara za socijalni rad. Posebno će se raditi na stvaranju uslova i osiguranju podrške za uključivanje ranjivih readmisiranih osoba u sistem tržišta rada.
12. Potpisnici ovog protokola se obvezuju da će raditi na osiguranju sredstava za finansiranje potreba u procesu prihvata, proprata i privremenog zbrinjavanja, kroz programe i projekte, kandidiranje potreba prema dostupnim i zainteresiranim donatorima, te kandidiranje ovih potreba u okviru proračuna institucija Bosne i Hercegovine, Brčko distrikta Bosne i Hercegovine, Federacije Bosne i Hercegovine, Republike Srpske, kantona, gradova i općina.

**Grafički prikaz relacija između nadležnih organa u okviru Protokola
za prihvata, proprat i privremeno zbrinjavanje ranjivih readmisiranih osoba
koje se vraćaju po osnovu sporazuma o readmisiji**

